



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma :



Tir Yimyim



tir_yimyim



tir yimyim

TAPAK 8

Air India tsükokba atema pilot

nem tai metongloktsütsüla: ICPA

Indian Super League 2025-26

season sota atar



ALL INDIA
FOOTBALL
FEDERATION

VOL. XXII ISSUE NO. 269 (ADOK 269)

DIMAPUR

TENTONÜ (MONDAY)

CHITENI (JULY) 14, 2025

₹ 5.00

NFHR nung Lotha Hoho den onok nokdaka lir: AVFRF

Dimapur, Chiteni/July 13 (TYO): Aggrieved Villagers on Foothills Road Forum (Bhandari & Changpang Area) ajanga Nagaland Foothills Road Construction dak sendakba nung Lotha Hoho pangzüng nung indang-indanga nokdaka aliba nenshia metetdaksüogo.

Aggrieved Villagers on Foothills Road under Bhandari and Changpang Area pur senden ka July 12, 2025 nü Bhandari Town, Wokha District nung mena liasü.

Chief Engineer, PWD (R&B) aser NFHRCC lia July 2024 nung tentetba Changpang Area Sub Committee on Foothills Road den final agreement yangluteper aliba alignment nung tawa tera melenshiba parnoki jembitsü asoshi iba senden ya amen.

Iba sülen Department ajanga August 7, 2024 senden Kohima nung amendang 2013 nungi mangdang yua aliba Nagaland Foot Hills Road nung nüburtemi aginüba ama NFHR inyaksü ta nangzüka liasü.

Longtsiri-Changpang ONCC-

New & Old Tssori village area nungi Sumi inhabited area tashi Baghty Division, Wokha District kübok Sumito ajanga Mangkolemba Division nung Longtho den sendaktepa NPWD, R&B ajanga tenzüka ya pela agizüker aser state sorkari tekeraba nung iba lenmang yanglutsü ayongzüker, ta sangdong ajanga ashi.

Foothills Road Issue dak sendakba nung June 15, 2024 nü Chief Engineer, PWD, R&B dangi Lotha Hoho-i takhangba agüja aliba bhukuma LLRPO aser Changpang Area Committee on Foothills Road nokdakba asoshia pelashishia agizüker, ta Aggrieved Villagers on Foothills Road Forum ajanga ashi.

Iba senden nung tatsü-talang ajak asadanga jembiba sülen Aggrieved Villagers Union yagi Lotha Hoho-i anir NFHRCC aser Aggrieved Villagers Forum den Merapani joint consultative meeting May 15, 2025 nü amendang renemba pangzüng nung nungittsü akangshia renem, ta sangdong ajangasa ashi.

Manipur nung COVID-19 cases tasen 5, active cases 25 lir

Imphal, Chiteni/July 13 (Agencies): Manipur nung COVID-19 cases ajema akumer, aser state nung active cases 25 dang kumogo, ta Integrated Disease Surveillance Programme (IDSP) ajanga tesüsa COVID-19 status report agütsüba nung shia lir.

Deobarnü Manipur nung COVID-19 cases tasen nisung pongu dak puteta June 1, 2025 nü nungi tenzüka state nung tang tashinung iba tashidak agi meneper nisung 323 lir. Tang tesüsa cases tem ya samples 24 tendangba nungi puteta daily positivity rate ya 20.8% lir, ta IDSP ajanga ashir.

Imphal West district nung maneni COVID-19 cases ya timba lir aser iba sülen Imphal East aser Bishnupur districts tem lir. Tang active caseload ya 25 dang kumogo aser shiranger timba isolation nung lir.

Kasa mapang taneptsü anguba tsütsü terenlokba tajung lir, kong nisung 298 mozüki nungi meyipa yokogo, anungji recovery rate ya 92.26% lir.

2020 küm iva virus mezüng jatetba sülen Manipur nung asür ajak agi nisung 2,149 lir. Tesüiba ghonda 24 tsüngta COVID-19 dak sendakba nung nisung asüba mali, ta ISDP sangdong ajangasa ashi.

NE nung maneni tzünglu sashia arutsü: IMD

Guwahati, Chiteni/July 13 (Agencies): Assam aser kidanger northeastern states nung anogo pongu tsüngta tsüngi-tsüngerperet den tzünglu sashia arutsü, ta India Meteorological Department (IMD) ajanga metetdaksüogo.

Guwahati nung aliba Regional Meteorological Centre ajanga Deobarnü tekumandangtsü ka sangdongba nung nüburtem dang saksalema alitsü ashi.

Assam, Meghalaya, Arunachal Pradesh, Nagaland, Manipur aser Mizoram nung tesashiba arutsü aser Tripura aser Mizoram tesem kar nung tera tajemba arutsü.

Kasa mapang region tesem kar nung yipru aser tsüngi-tsüngerperet dener tzülü arutsü aser Arunachal Pradesh, Assam, Meghalaya, Nagaland aser Mizoram tesem kar nung tzünglu sashia arutsü aser Meghalaya

tesem kar nung kanga sashia arutsü takzüta lir.

Days 1 & 2 mapang Arunachal Pradesh, Assam aser Meghalaya tesem kar nung tzünglu sashia arutsü aser Assam aser Meghalaya nung yipru dener tzünglu kanga sashia arutsü imlar. Day 3 mapang Arunachal Pradesh, Assam, Meghalaya, Nagaland, aser Mizoram nung tzünglu sashia arutsü.

Day 4 mapang Meghalaya nung tzünglu kanga sashia arutsü aser Arunachal Pradesh, Assam, Nagaland aser Mizoram nunga sashia arutsü amai takzüter.

Day 5: mapang Meghalaya aser Mizoram tesem kar nung tzünglu sashia arutsü aser Assam tesem aika nung tatsük alitsü.

Kasa mapang IMD ajanga tzümetsüng adokba aser alinen aluba tesem nung alirtem dak saksalema alitsü ayongzüko.

PM-i Northeast asoshi mejeta inyaker masü: AICC

Dimapur, Chiteni/July 13 (TYO): Union Minister Kiren Rijiju-i North Eastern Region nung nüburtem dang tila-teri terenlok mapa aser mapa nung shimokba atema Ato Kilonser Narendra Modi dang pelatsü ayongzüka ya tebilemtsü tulu lir aser BJP-i region yarir ama saka bendanga amshiba temai adoktsür, ta Rajesh Kumar Sethi, National Coordinator Incharge of Manipur, AICC Minority Department ajanga Deobarnü sangdong ka nung ashi.

Nüburtemi ya junga meteta alitsüla, India indang Ato Kilonser-i Northeast asoshi kecha balaka meinyaker, pa constitutional duty inyaker dang lir. Lenmang tem, mapa tem, tesendaktep, tajemtsü tzü aser security ya ruling party nungi sempet agütsür masü, item ya democracy nung senso ajak asoshi temeden lir, ta pai ashi.

Asen temeden asen nem agütsüba atema tepela lemsateptsü asü? Mesüra nangzüka ama meinyakba asoshi election ajanga shima aliba lenirtem-i telangzüba tejangja agütsütsü nüngdaker?

2015 küm Ato Kilonser Modi-i Naga Peace Accord ya ita ishika tsüngta tembangtsü ta

tasü ita sangdong, aser iba mapang iba ken o jembiba nung telok asem mesüra pezü dang liasü. Tanü küm ter jungnüa arudang tensa tamajungba ang kumogo. Yimjung melen tang telok 28 lir, tebenja, mangmangtepba aser telemsa tali ang adokogo, ta Rajesh Kumar Sethi ajanga ashi.

Nagaland nung aliba mesüra region nung aliba nüburtemi tenüngsang agütsütsü imlaba terenlokji ibai asü? Mesüra kanga ilonga solution nangzüka nungi mepetmesü tali ang kumdaktsüba indang kuli tejangja nüburtem dang rateta ashitsü langa lir?

Kasa mapang Manipur nung maneni azü ayimer, aser Ato Kilonser ola madoki repranger atar. Nisung 200 dak tema süaka, nisung meyerijang aika pei ki yutsür tesem balala nung jenshiaka, nisung aliba ki aser tekülem ki zünger mezüngmai rongjaka, PM Modi-i tanü tashi Manipur nung tetsüng ajemoka mali, ta sangdong ajanga ashi.

Nüktzü yima ajepba ola madokdaktsütsü ang meranger alinung komasür yarir ama bilemtsü? Lenisüba menden ya social media nung sangdong agütsüba indang masü, chichiba lenirji nüburtem timtemba mapang parnok den külemi

nokdaker dang ajar. Manipur-i pa kanga nüngdakba mapang pa (PM) kong liasü?

Kasam mapang Dimapur ya Nagaland kija atema masü saka region atema economic engines tongtipang ka ama züngshir, saka tensa kanga mejungi lir. Yimti nung tzümetsüng agi kongshir nüburtem kanga timtemteper aser basic infrastructure okshia samatsü jenjang nung lir. Basic governance-a mali alinung, kechi atema tenüngsang agütsütsü?

Congress Party-i teti tenüngsang bushiba masü nübur tenzüka nung amanger. Onoki onok mapa inyakba atema nüburtem nungi pelar ta ashitsü onokibo meimlar, ta sangdong ajanga ashi.

Nüburtem nem tali asüngdangdaktsüner, tali khangdaktsüner, aser noksa tangoktsü asoshi maangka bushia masü saka nüburtemi langa aliba angutsüla. Tenüngsang agütsüba yimya asenoki magizüksüla. Iba melen asenoki ochi, ajak asoshi yimsüsüba tajung khangti, ta National Coordinator, AICC Minority Department Incharge of Manipur, Rajesh Kumar Sethi ajangasa sangdong nung ashi.

Y Patton-i tzümetsüng agi kongshir aliba tesemtem semdang

Dimapur, Chiteni/July 13 (TYO): Nagaland indang Deputy Chief Minister, Yanthungo Patton-i July 12, 2025 nü Dimapur aser Chümoukedima district kübok tzümetsüng agi kongshir aliba tesemtem semdanga tawa tzünglu kanga sashia aruba ajanga teraksa bener arutsüba tsüngtong oa asadanga teyari agütsüba maparen reprangshima liasü.

Dimapur nung Vihüme & SM Colony (District Hospital tesülen), Chungaizang Colony (Burma Camp) along NH-29 aser Purana Bazar (Model Colony) semdanga liasü. Chümoukedima district kübok pai Airport Nallah (NH-29, opposite Progressive Motors, 2 ½ Mile), Razho Khel, Lane-1, Naga United Village, 5th Mile Model Village Ground Area aser Theruovi Khel, Sovima semdanga liasü.

Dimapur, Chümoukedima

asir Niuland nung tzümetsüngba tesem 10 semdangba sülen osangbener den jembidang, teraksa bener arutsüba ngua temulung shiranger, ta Y. Patton-i ashi.

Pai item tesemtem sema jajaba mapang administration aser police dang sorkar nemo sang tejangja agütsütsü totuyuba agütsü aser yangji ajemdaker cabinet nung jembitsü. Administration aser police nungi osang aruba sülen nüngdakba mapa inyaksü, ta pai ashi.

Kilentzü aoba lenmang agia mesüra amokbanga kilentsü aoba nung tetsükdaktsü agütsüba tesem nung alirtem dang lenmang aser ki o jen agientsü ayongzüka liasü.

Parnoki council members nema totuyuba agütsüogo aser parnokia parnokia akokba nung inyaksü, ta ashi.

Pai tang teinyakdak mapa terenlok asadanga liasü aser

nüburtem aser officials in-charge tem den sensaksema liasü. Link roads nungi jana indokba mapa tekeraba nung tenzüksü ta pai ashi aser officials in-charge tem dang tzümetsüng ketdangsüba nung renemshia alitsü indang jembia liasü.

Iba mapang Dy. CM Y. Patton-i nüburtem sen sensaksema parnoki timtem ajuruba lemsatepba angaa liasü aser sorkari teyari agütsütsü ta ashi. Paisa tim department tem dang damage assessments mapa inyaka tang atema aser tarutsü asoshi iba ama lendong nungi jenbua alitsü mera agitsü metetdaksü.

Tarutsü nung iba ama lendong majurutsü, kilentzü aoba aser lenmang tem tajungba akumtsü asoshi district agencies tsüngta teka amteper inyaksü nüngdaker, ta paisa ashi.

MPC pur menden melentepba sentong aka



Club pur tanu inti senden temer kelen MPC Chamber kima tangokba noksa.

Mokokchung, Chiteni/July 13 (TYO): Tanu Mokokchung Press Club pur inti senden ka Mokokchung Press Club Chamber nung menogo.

Tanu iba sentong nung audit report Auditor Convenor Imnawapang Jamir-i bener aruba teloki agizüka ayu aser iba den ano Mokokchung Press Club Logo Imrong Longchar-i renema bener aruba teloki agizüka yua liasü. Iba den külemi ano Nominating committee ajanga 2025 july nungi 2027 July kümren asoshi MPC ketdangpur tasen shima mapa nunglokja liasü.

Tanu Mokokchung Press Club nung President

Limalenden Longkumer, Secretary Sashimeren jamir aser Finance Secretary Aso Imsong parnoki mapang talangka MPC nung Menden balala nung inyaka arur sodi agüja liasü.

Mokokchung Press Club 2025 july nungi 2027 July kümren asoshi MPC ketdangpurtem Nominating Committee Convenor Aso Imsong ketdangsüba nung meden melentepba mapang agi aser 2025 July nungi 2027 July tashi MPC anitsüpurtem yamai shimteta mapa nunglokja liasü.

President -- Sashimeren Jamir, Secretary -- Yarden

Jamir, Finance Secretary - Imnawapang Jamir.

Executine nung Limalenden Longkumer, Tsüngtaluba Imchen, Imrongkümba Aier, Temjennaro Longchar aser Akangnungsang Jamir ta shima liasü.

Tanu iba sentong tanener President Limalenden Longkumer-i tepela o dena ano Mokokchung Press Club tashi ita aotsü asoshi tayongzükba o jembiba aser President menden melenzüker Sashimeren Jamir-i tepela o jembiba den tarutsü anogotem nunga Mokokchung Press Cluba tashi ita aotsü asoshi ajaki teka amteper shisa lemsatapa aotsü lemsatapa liasü.

NITI aser PHS na tezüluba nung tenangzüktepba yanglu



Dimapur, Chiteni/July 13 (TYO): Nagaland nung science education melenshidaktsütsü nükjidong nung NITI (NEET-JEE) Academy Dimapur aser Pilgrim Higher Secondary, Dimapur na tezüluba nung tenangzüktepba ka yangluogo.

Taruba academic year (2026-27) nungi Class XI Science kaketshirtem atema mezüngbuba School Integrated Program (SIP) amenoktsü atema tenangzüktepba ya yanglua liasü.

SIP model ajanga, board curriculum aser competitive NEET-JEE coaching ya ka küma longjemdaktsür aser iba ajanga kaketshirtem mapa aser tashi kümzüka toktsü aser kasa mapang nung parnok kaketshisatsü bushiba nung rangloker inyaktsü atema

maongka agütsür, kong rasa bilemdangba, onük tem jangjaba, sentong kanga junga yangluba, stress & time management techniques aser mock test tem densema lir.

Pilgrim Hr. Secondary School Administrator Bithungo Kikon-i ashiba agi, iba telongjem ya Nagaland indang education system nung temelenshi ka atema tongtibang jenjang ka lir. Kaketshirtem school aser coaching center tem tsüngda mapang intoktsü nüngdaka madoktsü. Parnok nem mapang ka nung dang tenüngdakba tangazükba agütsütsü, IIT alumni temi parnok dang len sayutsü aser Board aser NEET-JEE tatidang atema mapang ka nung dang renemtetsü aser item ajak ya school mapang nung dang tembangtsü.

Pilgrim Higher Secondary nung SIP indang features tongtibangtem rongnung, class tem ya NBSE curriculum + NEET-JEE syllabus lokteper agütsütsü, IIT alumni aser NITI Academy nungi faculty mongintemi tangazükba agütsütsü, mapang kümzüka den ajaki atutsüsa taah meshitsü, takok tajung anguba aser tekübokba jenjang nung aliba kaketshirtem nem Scholarships agütsütsü aser kaketshir shia dang lesson tem nendaka sayutetsü atema kaketshir aika manioktsüba densema lir.

Taküm Class X ajanger alirtemia iba SIP School nung züngoksemtetsü. Admission aser scholarship application dak sendakba nung osang mapang tatsüka tsüngda agütsütsü.

Wokha DRSC-i Grievance Redressal Officer shimogo

Dimapur, Chiteni/July 13 (TYO): Ministry of Road Transport and Highways tetuyuba dak ajemdaker District Road Safety Committee (DRSC), Wokha-i, Additional Deputy Commissioner (ADC), Wokha Renbomo Ezung, Cashless Treatment of Road Accident Victims Scheme 2025 atema Grievance Redressal Officer asütsü shimogo.

Iba inyakyim kübok Renbomo Ezung ya, gari tsükokba lendong balala nung densemertem, parnok nem teyari agütsürtem aser scheme kübok teyari meshiba mozükitem den tongteprateper

asütsü. Pa shimba ajanga Wokha district kübok gari tsükokba lendong nung densemertem nem jongka medical teyari agütsütsü aser teyari balala agütsüba tashi itshidaktsütsü imlar.

Ken o dak sendaka alirtemi Grievance Redressal Officer den iba number; 8413053935 ajanga indang indanga tongtepratepsetsü.

District Administration-i, gari tsükokdang mapang shitak nung jenjang agütsü aser tongtepratepa inyaktsü atema stakeholder ajak dang iba facility ya takok tashi amshitsü asoshi ayongzükogo.

Rev. Dr. Wati Aier-i Naga repatriation & healing kaket ka sayaogo

Dimapur, Chiteni/July 13 (TYO): Forum for Naga Reconciliation (FNR)-Recover Restore and Decolonise (RRaD)-i teyari agüja FNR convenor Rev. Dr. Wati Aier-i Honibarnü Hotel Saramati, Dimapur nung "Healing of the Lands: Reflections & Dialogues on the Naga Repatriation Journey," ta nüngja agütsür kaket ka sayaogo.

Iba kaket ya Dr. Pangernungba Kechu aser Dr. Talilula nati edit asü aser PenThrill Publication House-i publish süja liasü, kong kidang aser bendanglen aliba Naga

nungertemi teyari balala agütsüba indang zülua lir.

Kaket sayaba sülen Rev. Wati-i ashiba agi, "Healing of the Lands" ya Naga nunger tetsü tebou meyong tanüngzük balala kidangi meyipa bener aruba indang lir, ta pai ashi.

Paisa, iba kaket ya ochi, meyipa aruba aser tetsü tebou tem den sendaktepba ajang taneptsü anguba tetenzüker ka asütsü, ta ashi.

PenThrill Publication House Publisher Vishü Rita Krocha-i, "Healing of the Land" kaket ya kanga tongtibang, koba ajanga Naga nunger arok tejangraba sayur, ta ashi.

Noklak aser Phek DPDB senden ayonger

Dimapur, Chiteni/July 13 Administration-i sangdong ka ajanga, July ita atema District Planing & Development Board senden July 16 nü 11 ako nungi tenzüka Deputy Commissioner Conference Hall, Noklak nung amentsü ta züngsem ajak nem metetdaktsüogo.

Iba senden nung Common Pool aser Iconic Schemes densema 56AC Noklak aser 57AC Thonoknyu Assembly Constituency atema LADP 2025-2026 tembanga renemtsü.

MLA aser Chairman DPDB mazüngba ajanga taoba mapang metetdaktsüba anogo nung senden mementetsüsa aküm. Anungji iba senden nung DPDB züngsem ajak

jangrabangra arua shilem agütsü mepeshia metetdaktsüogo.

Kasa mapang nung Phek District Planning & Development Board (DPDB) senden-a July 14 nü Additional Deputy Commissioner, Pfutsero office nung 11 ako nungi tenzüka amentsü ta metetdaktsüogo.

Anungji Deputy Commissioner & Vice Chairman, DPDB Phek, Rhosietho Nguori, NCS-i, züngsem ajak dang senden agütsüba tesem melenshiba temulungdang yur jangrabangra arua shilem agütsü mepeshia metetdaktsüogo.

NSCN/GPRN-R (Akato)-i züngsem ka anentsü

Dimapur, Chiteni/July 13 (TYO): NSCN/GPRN-R (Akato)-i Tuensang yimtsüng nungi Thungpa'er jabaso Lieut. Col. Thungpang mapa nungi anentsüogo. Pai külem tenzükertem aser lenirtem akümtsüba masüba aser aiben masüba yimya benshiba atema mapang nungi anentsüogo.

Chang region eastern

command-ia, Thungpang-i senotsü mashiyimi amshiba ashishia pa mapa nungi agütsü takhangba agüja liasü.

Iba tetuyuba nung GSO -1 (Admin) of Naga Army, Brig. Jack Chophi-i sign süogo, aser osang agütsüba mapang nung mapa küma inyaksangshitsü, ta MIP sangdong ka ajanga metetdaktsü.

Indian Air Force Group Captain Shubhanshu den Axiom Mission crew July 15 nü alimai alutsü



Indian Air Force Group Captain Shubhanshu Shukla (abelen) aser ajichilen noksa nung pa densema Axiom Mission 4 crew angur.

New Delhi, July 13

(Agencies): India nungertem rongnungi International Space Station (ISS)-i mezüing atusangji Indian Air Force Group Captain Shubhanshu Shukla lir; pa densema Axiom Mission 4 (Ax-4) crew July 14 nikongdang 4:30 ako meta ISS nungi alimai tanaben meyipa alutsü, ta osang ka ajanga metetdaksü.

Parnok July 15 nikongdang 3:00 ako meta nung ang California tzüymkümlen Pacific Ocean tonga alutsü.

ISS nungi Dragon spacecraft ajanga alimai tonga alutsü atema ghonda 22 shi agitsü. Parnok tesüiba anogo 18 jungnüa ISS

nung lir.

Ax-4 crew rongnung Indian Space Research Organisation (ISRO) nungi pilot Shukla den tangar asemji European Space Agency (ESA) project nungi Commander Peggy Whitson, Poland nungi astronaut Slawosz "Suave" Uznanski-Wisniewski aser HUNOR (Hungarian to Orbit) astronaut Tibor Kapu nung lir.

Parnok ISS nung aliba mapang nung parnoki scientific experiment aika agiba den külemi outreach mapa aika inyakogo.

NASA Expedition 73 crew den tepila sentongji Hombar India nunger mapang

nikongdang 7:25 ako nung agitsü.

Axiom Space-i X ajanga, "ISS nung Ax4 crew indang mission tembangtsü mapang ana nung lir. Hombarnü parnok mapusodang anepdang 08:55 ako nung tepila sentong agiba repringang," ta metetdaksü.

Dragon spacecraft nungji oset touzük pound 580 alitsü, item oset rongnung NASA hardware aser mission mapang agiba experiments 60 indang data densema lir. June 25 nü Florida nung aliba NASA indang Kennedy Space Centre nungi SpaceX Falcon 9 rocket khaketja Axiom Mission 4 tenzüka liasü aser June 26 nü Dragon spacecraft ji ISS tonga liasü.

Air India tsükokba atema pilot nem tai metongloktsütsüla: ICPA

New Delhi, Chiteni/July 13

(Agencies): Tawa Gujarat kübok Ahmedabad yimti nung Air India tayimtsü tsükokba atema media kari pilot nem tai tongloktsüba dak sendakba nung India nunger pilot associations-i, Air India tayimtsü tsükokba atema pilots nem tai tongloktsübaji tim masü, ta metetdaksü.

Amongnü Indian Commercial Pilots' Association (ICPA)-i, 'iba ya pilot temi soseta asüba lir' ta jembibaji tajemdakdak maka, kechiyong pilot temi emergency mapang nung parnoki training mapang angazükba ama inyakogo, ta metetdaksü.

"Pei tebilemba jembibaji tim masü aser taochi mali. Tang iba ama tensa ka nung iba ama jembibaji tajemdakdak maka. Osang tejangja memeteti tai tulu tongloktsübaji tim masü aser tao...

[8:47 pm, 13/7/2025] Tangsen TY: PM Modi-i nisung 51,000 nem mapa nung shimokba shidi agütsü

New Delhi, Chiteni/July 13 **(Agencies):** Honibarnü Ato kilonser Narendra Modi-i nisung 51,000 nem Central sorkar mapa nung shimokba shidi agütsüogo; ibaji densemabo 2022 küm October ita nung Rozgar Mela tenzüka sülen nungi tang tashi nung nisung lakh 10 dak tema nem mapa nung shimokba shidi agütsüogo.

Mapa nung shimoker tasenpurtem den video conferencing ajanga jembidang Ato kilonser Modi-i, India nung tashi tulu ana lir ta alimai meteta dang lir, aser tashi tulu anaji ka demography aser ka democracy lir; tetezü alima nung lanur nütsüng teimba aliba linük aser alima nung democracy tulutiba lir, ta ashi.

"Lanurtem tashiji linük tarutsü jenjang tajung akümtsü atema tashi aser tenangzükba tulutiba lir. Iba tashi ya azükaru

atema asalentong ka kümdaktsütsü asoshi ozü sorkari aonung-anüngdang methitemi inyaker," ta pai metetdaksü.

Tejakleni aotsü atema ajaki maongka angutsü temsüa lir, aser iba atemaji teyari agütsürtemji sorkar asütsüla, ta pai ashi.

"Kü medemertem aser lanurtem. Ni nenok dak tamang akar. Ni nenok dak nungi tuluka imlar. Nü nem kechi mapa nungloktsüdir nunglokjaka sensotem tama südakjang. Parnok yariang aser parnok khuret pungbadaktsüba ajanga linük kanga keraa aintsü," ta pai ashi.

Tawa Union Cabinet-i Employment Linked Incentive (ELI) scheme agizükba dak sendakba nung Modi-i, "Private sector nung tang mezüing mapa angur lanurtem shia nem sorkari sen 15,000 agütsütsü, iba tetezü mezüingbuba itasenjibo sorkari agütsütsü. Iba atemaji sen 1 lakh crore lemozüktsüogo," ta metetdaksü.

Tawa International Labour Organisation (ILO)-i sangdongba report nung ajemdaker Modi-i, tesüiba küm 10 tsüngda India nung senso crore 90 bo welfare schemes agi ayimjemogo aser ibaji social security ulushitsü atema nüngdak, ta ashi.

Paisa linük nung nütsüng crore 25 bo kanga sensak tia nungi anitetba metetdaksü.

Iba atema World Bank ama International Institutions-i yimjak nung India nem tenüngsang agütsür, aser tangbo ajak kasa züngshiba tsütsü India ya alima nung temaba jenjang nung aliba linüktem rongnung densema lir, ta pai metetdaksü.

"Iba tetezü kasa mezüngshiba kanga ajema kümdar aser kasa züngshiba jenjang tajungba kümdar. Iba temelenshi ya alimai repringtetdar," ta paisa shisem.



July 13, 2025 nü Mumbai nung 150buba 'Save Aarey Forest' anogomong nung Aarey arem nung 'metro car shed project' anema telok kati longkak aitba noksa nung angur.

Bendangertembo Voters List nung mezüngoktsü: EC

New Delhi, July 13

(Agencies): Amongnü Election Commission of India (ECI)-i, Bihar nung Electoral Rolls atema Special Intensive Revision (SIR) agiba mapang nung Nepal, Bangladesh aser Myanmar nungi aruba bendanger aika aliba metetogo, ta metetdaksü.

Item ama bendangertemjibo taküm September 30 nü sangdongtsü aliba final Voters List nung mezüngoktsü, ta Election Commission-i metetdaksü.

Taküm November ita nung Bihar nung assembly election agitsü lia June 25 nü Bihar nung SIR inyakim tenzüka liasü. Booth Level Officers-i lemtsüba Enumeration Forms agütsütsü atema July 25 tashi mapang agüja lir aser August 1

nü voters indang draft list sangdongtsü.

Enumeration Forms denji külemi agütsütsü atema ECI-i documents 11 metetdakja lir, saka item documents nungji Aadhaar cards, voter ID cards aser ration cards bo maden.

Ajisüaka draft roll sangdongba sülen-a maitsü atema documents agütsütsü akok, ta Election Commission-i metetdaksüogo.

SIR anema Supreme Court nung ken o aika benoka lir. July 10 nü item ken o angadanga mapang nung Supreme Court-i Election Commission dang maitsü jangjatsü atema Aadhaar, Voter ID cards aser ration cards-a agizüktsüla, tabo shiogo.

Item ken oji maneni July 28 nü angadangtsü.

Booth Level Officers-i Bihar nung kiboktem semdanga verification agiba mapang nung Nepal, Bangladesh aser Myanmar nungi arua alir bendangertem aika aliba jangjaogo. Item bendangertem tenüngji final electoral rolls nung mezüngsemtsü.

July 12 nikongdang 6:00 ako tashi nung Enumeration Forms ajak menünga lemtsüogo, aser kasa mapang tashi nungjisa form 6,32,59,497 (shilem 80) bo bendenogo, ta Election Commission-i metetdaksü.

Tang Bihar nung Chief Electoral Officer lenisüba nung District 38 nung Election Officers, assembly constituency 243 nung Electoral Registration Officers aser Assistant Electoral Registration Officers 963-i item maparen inyakdar.



Jammu, July 13, 2025: Jammu & Kashmir sorkari Naib Tehsildar recruitment examination nung Urdu oshi ya compulsory subject ka asütsü atema telemtetba agiba anema longkak aiter Akhil Bharatiya Vidyarthi Parishad züngsemtem police-i apuba noksa nung angur.



TIR YIMYIM YIMOBILEM (EDITORIAL)

DIMAPUR

TENTONÜ

CHITENI 14, 2025

Sen aaba o akaba na mesütep !

India lenbo government-i nisung shia mapa inyakba nungi sen aaba den pei akaba ali rongsen sütep asü mesütep ta kanga sashia mita repranger. Iba jagi, talisa, government mapatem nung senotsü amshirtem kümdangdaksür aser sübokrem amshiba mapatem mesademi kümdaksür. Aji oda, government office ka nung mapabo tilateri ka inyaker ser nung pei ita sen den meputep gari tajung ka alia amshia ngura mesüra ki tulu tajung ka yanglura mesüra pei ita sen den mesütep ali tuluka alira, itemji Central Bureau of Investigation mesüra Enforcement Directorate (ED) ama senotsü ochimashiba maparen bushisüngdangertemi ki tashi tonga oagi asüngdangya tenzüker aser temulung melemettsüsa reprangtetra pua yur ken o asüngdang. Atangji, asen lima nungbo manger sangwa nung koba nungi komaser senotsü bushiteta takar akümar mejangjatetika pei mapa den mesütepka takar kümaka, Tsüngremi kanga moatsüogo ta ser sarasademtsütsüba dak alaka, tebushir mali, anungji mashi ka nungi asüyonga takar kümteter tashi tia taka aser takar mekümteter tashi tia-a maka aser tagidak-a maka ta züngshir. Ajisüaka, asenoki agiba senbo tangar sen aser itemji asenoki mashimashi amshir ta asüba mapang ya tatem kati arudagi. Aji oda, tangar India nunger ama asenoki aaba nungi government nem Income tax magütsüaka, tangbo asenok ajaki osettsüset alidang GST agütsür aser küm shia küm tatem nung Income Tax agütsürtemi inyakba den kasa asenoka Income Tax Return center government nem metetdaksür. Ibaji ka melira asenoki bank nungi sen a maputettsü aser asen sen ayuba asüyonga küm nung sen lakh 20 dak tali agizükra, tagizük shia 2% government senpongi aotsü. Iba tetezüji, tangar ama asenoki government nem peisasa aatetba sen nungi Income tax magütsüaka, government-i aseni küm tsüngda nung sen aaba aser endokba jenjang metetner aser aji metetdaksütsüla. Iba jagi asenok senotsü amshiba maparen nung ochishidaksür aser kanga kümdangtsüsa akümer. Aji oda, tang asenok ajak asoshi tekümdangtsü aser tangazüktsü mapa ka atalokbaji, Nagaland nung Food Corporation of India (FCI) nung inyaker Cashier kati taoba küm 6 tsüngda pa nüngdak nung sen crore 19 amshiba puteta pa mapa nungi anentsür külen CBI-i pa rongsen aruba lenmangtem bushisüngdang tenzükbaba ya asütsü. CBI ajanga bushitetbaji, iba Cashier-sang ya pa ita sen nungi taoba küm 6 nung aaba sen ajung agi sen lakh 40 shi liasü aser kasa kümtem nung pa kinungtsüi aaba sen ajunga agi lakh 27 shi liasü, anungji tenati sen crore 19 tashi tajangzük bushiba mapatem nung amshitsüsa ngutetba senji tenati tim lenmang nungi anguba mesayutetra, parnok asoshi teblemtsü tulu akümtsü. Atangji, CBI ajanga ashiba agi, Cashier sang jagi SBI bank nungi sen lakh 65 shi ki yanglutsü asoshi apuba kulir lir. Ajisüaka, item jagi sen crore 19 tashi amshitettsüsa sen aruba kuli CBI mulung süa mesayuteter, anungji CBI-i pa anema 'Prevention of Corruption Act' nung ajemdaker ken o agütsüogo. Ashiko, pa amaji, ano Nagaland nung pei ita sen mesüra pei mapa nungi aaba sen den mesütepi ali rongsen akaba nisungtem aika anema CBI mesüra ED purtemi tenük yokdar asütsüa akok. Aji oda, ashiko tarutsü anogotem nung FCI nung inyaker Cashier sang amaji, pei mapa den mesütep ali rongsen akar Naga nungertem karbo CBI aser ED purtemi bushiba osang angashitsüa akok. Joko, asenoka asenoksasa azüoka asen mapa nung ochishia inyaktsü mapang atonger. Ashir ashi, yimkong meyong agi kü kisüng takar akümtsü aser aji anema ola adoker a mali aser tebushir a mali, auyar tia ajung aser maayatetertem tia maka ta ser koda Nagaland nung yimsüsüa aotsü ? Asenokibo maktsüa akok saka tangar asen mapa o asen akaba na ngur taak marem, bushisüngdang tenzüker !

OLEMSABANG

Sobaliba Libaliru Tamajung Kar

P. Renthly Jamir.

(Yashi adok nungi...)

Oktsü o Azü na rara,
Oktsüi akok, scüa pa achi,
Tesü Azü ngang ta asang.

Mokokchung High School nung azüngeria yamala ken atenbaji asenok shiruru den külemi tembar kümer scü pi ak nembo mechidaksünü aliba yashi tashi lia aru. Asenok ak, nashi den pilaba. Changtongya Town nung ni town committee Chairman asüandang 1982 January nung AKM sentepsü onoki nangzük. Anungji iba mungdang tenüng atemer ak, nashi, napong ajak shibangtsü onoki public meeting ayongzüka ozüng tesashi ka renem. Shinga open latrine mayutsü, ak shibanger mesütsü, nashi, napong free mechioktsü. Nashi, ak ajak local wala dang liasü. Mokokchung DC T.P. Imchen IAS den jungjunga police yoka ak akatsü jembü. Joko Changtongya EAC ajanga mapang shia Mokokchung police jazüka ak meshibangi senzüa alir ajak kaset onok Town Committee purtemi aonung anepawa nashi, napong ajak pua sen achi.

Ak aika kaset, nisung aika dang sen achi, tenzüker tajung kati napong meshibangba senchi sen 25 magütsü. Anungji EAC Imkongkümzüc Jamiri office-i jar oko revival nung nenokang tanishir aser Lai nung bangdak tashi angatsü shia lir ta shia senchi meshitsüba bilemteter. Yamaji 1981 küm piyong nungang AKM tenüng nung shiruru shibangtet. Iba sülen Ao lima Town Chila aser yimtsüng ajak nung open latrine shibanga ak shibanger metsüyonga ao. Tanü lanurtemi asen sobaliba libaliru Kotak lima ama tuketa ali ama bilema jembir/zülur. Anungji ni iba detail ya ken dena zülur. Onok tanur asüandang nashi, jang, ak kechi tashitak wara agi asü memetet, ajak achiba agi yim ajak nung tamachi, sowasolemer, tekong awaker nükpoker kokdang matang yiar zünger mezüngma liasü. Tanur temang komo longra agi zükbanger tepok waker teimba liasü. Kidang koya agi mejaka ao majung, chipo aonpo ajak nung angushir. Ki atem yipden tasüng azüpong, meni, antsük tokolak semoktsü langtem, süpeti ajak atsük tesa, metzü poyatsüka liasü. Sünglang tasüng kübra longpen mopomeyak tesempatsüka liasü.

Asen tsürabur libalirua aruba tanü ama ya aya memetet takar tesa tsüngkoteptsü abener waist coat Arüsür ozü ama merema sobur kenüamati benjunga lia aru ama bilemer. Sensaker kümpiyong chi tepok sünga mechiyung shi tua süzüng tepa süngolio teimba chia aru. Arür tsübu agi süngben tzütaia mashi motet. Aor sobaliba nung Moatsü tsüktem ta ajaba ya Moatsü dangbo sensaker ajak chi tepoksünga chiyunger benjung nung longsoa tendaktsütsü mejeta agütsüba lir. Iba tsüktem yabo pari magütsütetra onoki meshitsütsü ta arju nungeri kuli süa ataktsür koba telok dang kuli zünger ta ajar. Tsüngkoteptsü ya yimsüsür arürleper ajaki aben masü takar süchirtemi teimba aben. Arürleper yimsüsür asüyonga sensaker lir parnoki alia, taka mabentet. Onok tanur asüandang tsüngkoteptsü abener Ongpanglen tua alir tambur ka ka dang angu. Aor traditional sü ta asüabajibo sünak dang lir. Tetsür tebur takar sensaker ajak sünak abenba agi AO SÜNAK ABENER ta ajar aser akhidang foreignertemi noksa agiba nunga sünak abener teimba angur. Oboula nunger tia maka putu tamajung tantsür tambur amitsür sangremer temesür mali karbo anepdang ki lapoka malunungang kiyonger reprangdangdang sür alibasa angu. Aser iba putu nung tantsür tambur bangpet o jembibaji yakta sünnür sensak tia nung temesür mali kecha agütsür mali timtem maremteter. Tang onok yimer arishi küm noklang tema ana lir, tokur temabo aika lir. Aser parnoki ashibaji nenok lanur putu tajung ya yutsür mesünür. Temeimeri bendentsüba mechimmar. Süoshia sobur mesobumar. Alemlü asen tsürabur akümlü molumi nung ali, tanü asenok akümlü Kotak nung alir, rarabangsener mali yim putu ungkilang nung ken o ashishitepa jembiba mali. Dobashi court nung okar mali, balalular mali, tali taremsür ajak takar.

Anungji lanurtemi Aor sobaliba tajung ajak samadaksür ta bangpet jembia mekazüi Tsüngremi na iba putu tajung nung lisemdaksüba atema pa tenüng sanga temeim mapa inyaka asen lima aser nübur tenzükbaba wadang nung ochishia noktaksü ayongzüker. Nai na ochi nung indang indanga lira sobaliba tajungtemji ne dak poktettsü. Ya zülua lir, "Saka tamashi tasüngdangtepba kidong otsü bangsentepba aser ozüng indang raratepba item ajak nungi na pilaa liang kechiyong itemi tajangzük maka aser amajok." Tit:3:9. Kechiyong pai ammag ain nungi asenok kümzüc aser pei meimba chir yimli nung asenok meyipa ayu. Kolosi:1:13.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Sudan nung sepaitemi Khristantem kiojen 100 dak tali rakzük



Sudan yimtiba, Khartoum kübok El Haj Yousif kiyong nung aliba Pentecostal Tenla kidang Khristantem tekülem sentong agiba noksa nung angur. Tawa sepaitemi iba Tenla ki amak.

July 12, 2025: Sudan linük nung Sudan Armed Forces (SAF) aser Rapid Support Forces (RSF) na tsüngda mapang talangka raraa aruba mapang nung sepaitemi Tenla ki aika maakogo aser temeshi tesemtem raksatsür.

Tawa Sudan yimtiba Khartoum nunga Sudanese Armed Forces aser police na tsüngda raraba mapang nung Pentecostal Arogo Tenla ki ka raksatsüogo.

Yaküm Sudan nung civil war tenzükba sülen Tenla ki aika maakogo, aser tang tesüsa Khartoum kübok El Haj Yousif nung aliba Tenla ki amak. Iba Tenla ki ya 1990s mapang nung asüba lir, ta Christian Solidarity Worldwide (CSW)-i metetdaksü.

CSW Chief Executive, Scot Bower-i, Arogo kiojentem amakba ya Rome Statute kübok aibelen tulu lir, ta metetdaksü.

Alima nung Khristantem reshikangshiba linük tamajungtibatem tarensen nung Sudan ya jenjang 5buba nung lir (Open Doors' World Watch List).

Sudan nung rara tenzükba sülen sepaitemi Tenla kitem aser Arogotem meyong kiojen 100 dak tali rakzüka agiogo, ta CSW-i metetdaksü.

EU dang Europe nung Khristantem anema inyakba nokdangtsü mepishi

July 13, 2025: Spain nung yimsü temeden atema inyakba telok kati European Commission Tir dang Europe nung tesempa agi Khristantem anema inyakba nokdangtsü atema Special Coordinator ka shimang, ta mepishia metetdaksü.

Observatory for Religious Freedom in Spain-i European Commission Tir, Ursula von der Leyen dang Yihuda nunger sempaba aser Muslim nungertem sempaba nokdangtsü atema Special Coordinators shima aliba ama tesempa agi Khristantem anema inyakba nokdangtsü atema-a European Commission-i specialists shimtsüla, ta metetdaksü.

"Yimsu nung ajemdaker tesempa mapatem nokdangtsü atema European Commission-i inyakba ama tanga yimsü anema inyakba atema-a inyaktsüla," ta OLRC Tir Marka Garcka-i sangdong ka ajanga metetdaksü.

Laisa, Europe nung Khristantem anema inyakba kanga bulua ataloker; 2024 küm "Intolerance and Discrimination Against Christians in Europe Report" nung Europe nung aliba linük 35 nung Khristantem anema tesempa agi inyakba tatalokba 2,444 liasü ta Observatory on Intolerance and Discrimination Against Christians in Europe (OIDAC Europe)-i metetdaksüogo, ta ashi.

Tawa France aser Germany naprongla nung Khristantem yimsü temeden anema inyakba tatalokba aika lir, ta OLRC-i metetdaksü.

"Tesüiba hopta ishika tsüngda Paris nung aliba Sacred Heart Tenla ka sabang nung tebur kati 'Allahu Akbar' ta ayimdenba, Bavaria nung Tenla kidang mi senoktsüba mesüra Rodgau (Germany) nung Kangki ka hadir ama amshia Arogo nung tenzüker ka amakba tatalokbatem densema Khristantem anema inyakba tatalokba aika lir," ta OLRC-i metetdaksü.

OLRC-isa 2023 küm January 25 nü Algeciras, Spain nung kiralongrar kati Arogo nung tenzüker, Diego Valencia Contreras tepsetba metetdaksü.

Yaküm November 9 nüa Valencia nung arrshi küm 76 putir ka tepsetba parnoki metetdaksü. Ano Gilet nung nisung kati pa Yisu Khrista, ta shia Santo Espkritu del Monte monastery telungi aiba sülen putirtem densema nisung aika yiruja liasü.

2023 küm Spain nung Tenla kitem aser Khristan maitsü raksatsüba tatalokba 36 liasü aser yakumbo item ama tatalokbatemji teimba liasü.

"Tenla kitem aser Khristantem amakbaji European Union-i odangbo meyutsütsüla. European Commission-i item tatalokba ya asadangtsüla aser yimsü nung ajemdaker tesempa mapatem nokdangba ama tesempa agi Khristantem anema inyakba-a nokdangtsüla," ta Garcia-i ashi.

"Europe nung yimsü balala amangertem tesünep nung aliba aser yimsü temeden amokmeren jenjang ka nung lir. Anungji onoki European Union dang Khristantem anema inyakba nokdangtsü atema Special Coordinator ka shimtsü mepishir," ta laisa metetdaksü.

OLRC-isa Europe nung alirtem dang parnok indang website nung iba takhangba pusema temepishiba ka nung sign südaksüner, ta mepishia metetdaksü.

Nigeria nung tekülem sentong tagidak mapang Pastor ka khaset

July 13, 2025: Taoba Hombar nikongdang Nigeria kübok Katsina state nung tekülem sentong tagidak mapang Islamic kiralongrartem pastor ka den Arogo züngsem ka khaset aser tetsür ka puer ao, ta osang ka ajanga metetdaksü.

Fulani kiralongrar 15-20 shi Yaribori nung aliba Bege Baptist Church Tenla ki telungi aiba sülen Rev. Emmanuel Na'allah Auta aser Mallam Samaila Gidan Taro na dak injang khaloktsü. Gidan Taro ya Islam yimsü toktsür Khristan yimsü agizüker ka liasü. Pastor Emmanuel Na'allah-i yimdak Muslim nungertem aser Khristantem tsüngda tesünep nung alitsü atema inyaka aruogo.

Osangbener den jembidang Arogo nung züngsem, Zakariya Jatau-i, pastor Rev. Emmanuel leniba nung tekülem sentong aser Bible study agiba mapang nung kiralongrartem arua pa dak injang khaloktsü, ta metetdaksü.

Paisa, "Ano Arogo nung züngsem tetsür ka puer ao," ta metetdaksü.

Taküm May ita nungi tenzüka Nigeria kübok Plateau state nung Khristan 80 tepsetogo; June ita kija nunga Khristan yimtsüngtem amakdang Khristan 20 tepseta liasü.

June 27 nüa Mangu County kübok Langai District nung nunga Fulani teloki Khristantem meyong ki 96 rongdoktsü aser Khristan ana tepseta liasü.

ANO GO ABEN TSÜNGREM DEN

Temulungjang mapa

"O kü Tsüngrem, nai mulungba inyaktsü ni pelar; Au, ne ozüng kü mulunglen lir".

(T.Ken 40:8).

Tsüngrem-i mulungba inyaktsü jangratsübaji temulungjang mapa lir (T.Ken. 40:8). Pai mulungbaji kechi? Pa temeim sayubaji Pai mulungba lir. Tsüngrem-i asenok dang meim nung ola madoki Pai asenok asoshi inyaker. Aseni tetibo Pa lenmang mangatettsü akok. Pa lenmang mangatet dang ken ken Pai asenok sendoker ama bilemer. Saka asenoki Pai mulungbaji meimtsüla. Pai mulungba nung asenoki jangra-a lira asenok Pa mulungjang anasa lir.

Tsüngrem o-i Pai mulungba jungkai adoktsür. Asen mulungjang nung Tsüngrem o mongdaksüra, Tsüngremi mulungba asen mulungjang nung lidaktsür, aser Pa dang tashi angadaktsür. Paul-i iba indang Efesa 6:6 nung zülu : "Nisung peladaktsürtem ama tenük mapa agi masü, saka Khrista tenzüker ama Pai mulungba inyakang".

Temulungtetba aka nung dang Tsüngremi mulungba nung anidaktsü akok. Temulungtetba makaba ajanga azümasen kilir akümer. Tebur dang meimba ajanga techir akümer.

Itemji aseni Tsüngremi mulungba nung pelaseta aliba ajanga adokdaktsür. Ibaji temulungjang nungi adoker. Angazüktsü, meimtsü, inyaktsü, arutsü aser aotsü aser Pai mulungba metettsü asoshi Pa ozüng ne mulungjang nung teti yuang.

Iran linük nung ketdangsertemi Khristanyimsü agizüker 21 puogo

July 13, 2025: Israel aser Khristantemji karbo ozüng Iran na tsüngda rara anenba tasenba kübok apu. Israel sülen Iran nung mesüra United States ama ketdangsertemi Islam yimsü toktsür Khristan yimsü dangi meyipier nisung 21 puogo, ta meimchir temeden atema inyakba telok kati "Intensification of Punishment for Espionage and Cooperation with the Zionist Regime and Hostile States Against National Security and Interests," ozüng ya taküm June ita tatembanglen ang Iran parliament nung agizüka liasü, ajisüaka Guardian Council-i iba ozüngji asadangtsü.

Iran yimtiba, Tehran, Varamin aser Kerman yimtittem nung Ministry of Intelligence nungi ketdangsertemi tesem balala Guardian Council otongdar, mita aoba mapang Hadi Tahan-Nazif-i, iba ozüng nung shilem karbo 'legal' tsütsülen nungi ashishitsüsa lir, ta metetdaksü.

Tang tashi nungbo Khristan 21 ji kechi kuli nungsa Tan ita tetenzüklen Iran ajemdaker apuar mejangjar, nung shisashirtem, Jurists aser ajisüaka karbo Laishiba bena lawyer 57-ibo yimjak nung shidi ka ajanga iba ozüng aija liasü.

Iran linük temzüng kübok Khristan yimsü ya 'recognize' Israel ama linüktem den süa aliba yimsü ka lir, ajisüaka amalitepa inyakogo, ta tai tang tashi Islam yimsü tonglokja pua alirtemji aitsüra amangertemi Khristan yimsü tasüba temerenshi-a agizükba ya linük security agütsütsüa akok. atema amokmeren ka ama züngshir.

"Tang pua aliba züngshir.

AO OSHI ANGAZÜKDAK:
TANÜ ANGAZÜKTSÜBA OJANG



Tera

(adj) ishika, tilaka (little)


* Ozü kibong asoshibo chiyongtsü tera agi perir.

Teradang

(adj) tesadang, telemadang (a piece)

* Tetsüi tanur nem amtsük teradang ka agütsü.

OLONG PAITEP # 7208



TIPIEN

1. Ajem-ajemer - 9
5. Kanga tapet - 7
6. Ozü ka tenüung - 3
7. Tzünglu nungi kümzüker - 6
8. Anüung nungi tsüker - 3
9. Anüung shiruru - 3
11. Lenmang ajurutepdak - 6
14. Anüungdang tesangwa - 3
15. Tekong merang - 7
16. Teyazü jembia tangar
ashioktsür - 9

LANGTSÜNGLEN

2. An-i akor - 5
3. Tashi aketba chiyungtsü - 5
4. Kecha menungnangi - 4
10. Küm asem tarensen - 5
12. Nisung yimyatsüya - 5
13. Mali / mait - 4

OLONG PAITEP # 7207 TELANGZÜBA

TIPIEN :

1. Atang, 3. Akuku, 5. Ajem, 7. Osü,
8. Akok, 10. Nati, 11. Sempa, 12. Itsü,
14. Saru, 17. Aru, 18. Inti, 19. Akong,
20. Senti.

LANGTSÜNGLEN :

2. Tajak, 3. Ayok, 4. Kiset, 6. Maksü,
9. Ama, 10. Nashi, 13. Tarak,
15. Ratet, 16. Sang.

NAI-A YA METETTER MA



US lima yimjak nung moko machitsü atema mezüngbuba 1973 küm nungi nokdangtsü tenzük. Airline company-tem ajak dang tayimtsü nung moko achiba aser moko machiba tesem balala lemdangtsü tetuyuba agütsü. Ajiser 1987 küm nungibo ghonda ana dang teküpbokba jajaba tayimtsü ajak nung moko machitsü nokdang.

Drone amshia onok amak; Nayan Asom süogo: ULFA-I

Dibrugarh, Chiteni/July 13 (Agencies): United Liberation Front of Asom-Independent (ULFA-I)-i, sangdong ka ajanga Deobar anepdang züngia lia India aser Myanmar na arrtsü nung parnok tese drone amshia amak ta metetdaksüogo.

Iba telungpur telok yagi ashiba agi, Israel aser France na nung yangluba drone amshia Indian armed forces-i Longwa (Nagaland-Myanmar arrtsü) aser Pangsu Pass (Arunachal Pradesh-Myanmar arrtsü) na tsüngda ULFA-I aser RPF/ PLA teseptem maka liasü.

ULFA-I indang publicity

wing Assistant Secretary, Second Lieutenant Ishan Asom-i sangdong ka ajanga ashiba agi, Deobar anepdang 2 ako nungi 4 ako tashi nung drone 150 dak tema amshia sepaitemi parnok maka liasü.

Paisa, iba lendong nung lenir tejen Lieutenant General Nayan Asom teseet aser parnok mangyimdar ta ashi. Kasa mapang nung tese balala amakba mapang parnok züngsem 19 shi yiruogo, ta Asom-isa metetdaksü.

ULFA-I pur ya nüjiso asoshi joko küm aika rara arudar aser parnok ya sorkari tenokdangba agütsüogo aser iba telok nungi

lenirtem aika apuba den ken o balala nung aija aika aputsü bushiba mapang ka lir.

Kasa mapang nung Assam Chief Minister Himanta Biswa Sarma-i iba ken o ya jangjashija ashiba agi, missile ka mesüra drone amshia United Liberation Front of Asom-Independent (ULFA-I) tese amakba aser lenir tejen ka tepsetba indang state sorkari kecha osang angazüka mali.

Deobarnü osangbenertem den sensaksemba mapang Sarma-i ashiba agi, missile mesüra drone amshia amak ta tai tongloksüba nung Assam police densema mali ta shiogo.

Media-i 'Bengali-origin' ta oren amshiba PPFA-i aitsü

Guwahati, Chiteni/July 13 (Agencies): Assam nung nationalist citizens forum, Patriotic People's Front Assam (PPFA)-i sangdong ka ajanga, Assam sorkari oziung alema ali atsünger alirtem ket nungi ali bigha meyirejang aika meyipa agitsü atema jenjang agiba pelashishia agizükogo, aser kasa mapang nung temzüng oziung dak ajemdaker item kibongtem nem tapet teyari agütsütsü nüngdakba lemsatepogo.

Iba lokti tentet yagisa, Assam lisopurtemi iba inyakyim ya pusemstü, koba sorkar balala melentepa aruaka

küm aika benoka minyakteti aruogo, ta metetdaksü.

PPFA-i ashiba agi, Asomiya ya tashi mait masü aser telangzüba kecha magütsütsü ta bilema shingaija iba lokti ya blackmail mesütetstü.

"Kasa mapang nung media outlets kari Assam nung tang ali atsünga aliba atema aninertem dang 'Bengali-origin Muslim community' ta nüngja amshidar. Parnoki kechiba kidanger linük nungi Assam-i aitba item kibongtem atema 'Bangladesh-origin' mesüra 'East Pakistan-origin' oren ya amshitsü memulunger shingaija

memetet. Bangladesh aser East Pakistan ta amshiba ajanga Asomiya nungertemi anemtsü ta bilemer asü parnoki onok ashioktsütetstü ta bilemer," ta PPFA-isa ashi.

Assam nung tang district balala nung oziung alema srokar ali atsünger alirtem aninba mapang ka lir aser tang tashi nung ali bigha aika azüngtetogo. Tang tashi nung tesem timba ka nung kecha timtem makai iba inyakyim benoka arudar, saka tesem kar nungbo nüburtemi sorkar anema nokdakba ajanga mepetmesü adokogo.

Manipur nung PLA züngsem ka apu

Imphal, Chiteni/July 13 (Agencies): State aser central sepa team kati People's Liberation Army (PLA) züngsem ka apu aser taoba ghonda 36 tsüngda Manipur kübok tesem balala meita aoba mapang prangbong injang, bomb aser communication device tem aika nguteta liasü, ta ketdangsürtemi Deobarnü metetdaksü.

Police-i ashiba agi, parnoki apuba telungpursang ya Bishnupur, Imphal East, aser Imphal West districts nung sorkar office, shishilembartem, local dokan kiburtem, oil pump tem aser khu belenshirtem nungi

senotsü rakzükrakdemba nung densema liasü.

Iba nisungba ya Thoubal district nungi Thoubal Police Station kübok Wangjing Bazar nung pua liasü. Aija alisang ya Kumbi Police Station, Bishnupur district kübok Laingoubi Mayai Leikai tesem nung alir Meisnam Manglemnganba Meitei ta jangjaogo, shiba dang Chumthangkhanba (27) ta ajar.

Security force temisa pa ket nungi mobile phone ka, SIM card ka, Aadhaar card ka, PAN card ka, Voter ID card ka aser sen asepa juli ka nguteta liasü.

Kasa mapang nung Maphou Dam Police Station, Imphal East district kübok Itham yimtsüng anasa Itham Uyok Ching tenemtsüng meita aoba mapang sepaitemi telungpur tese ka nungi prangbong injang aika nguteta liasü.

Sepaitemi ngutetba prangbong injang aser hadirtem rongnung 12-bore gun ka,.32 ammunition ana,. 36 hand grenades ana, .32 pistol ka den magazine, live 12-bore cartridge ka, tube launcher ana, Baofeng RS radio wireless set ka den charger, aser detonator ana densema liasü.

Arrtsü nung ken o bentetstü atema Assam & Meghalaya nati inyakdar

Shillong, Chiteni/July 13 (Agencies): Assam aser Meghalaya na arrtsü nung mapang talangka mangatetep aliba bentetstü atema jenjang agia, state anaprongla nungi ketdangsürtemi arrtsü officially asadang tenzükogo.

Survey of India den Assam aser Meghalaya sorkari state ana tsüngda arrtsü nung mangatetep aliba ya benteta arrtsü kanga junga lateta ayutsü atema inyakdar.

Survey of India indang

Assam, Nagaland & Tripura, Manipur, Mizoram Geospatial Directorate, Guwahati nung coordination senden ka amenba sülen arrtsü asadanga aoba ya tenzüka liasü.

Fieldwork ya July 1, 2025 nü Hahim nung tenzükogo. Ketdangsürtemi 2023 küm amenokba arrtsü nung tongshitem takok ngua asadanga sülen tasen yanglu tenzükogo.

Iba sülen tasüng July 2 nü tanga team kati Gizang tesem nung arrtsü asadang tenzük.

Parnoki ground coordinates tejangja agitsü atema advanced GNSS (Global Navigation Satellite System) technology amshia liasü.

Survey of India-i ashiba agi, iba inyakyim nung Assam aser Meghalaya state sorkar, Survey of India aser media-i yakyaka shilem agiba ajanga tesendaktep tajung nung kecha tetsükdaksü makai mapatem ochishia inyaka odar, koba arrtsü nung mangatetep aliba bentetstü atema tongtibang jenjang ka lir.

European Union aser Mexico-i Trump indang tariff aitsür

Washington, Chiteni/July 13 (Agencies): United States Tir Donald Trump-i August 1 nungi tenzüka European Union (EU) aser Mexico nungi bener aruba osettsüset nung tariffs shilem 30 shimtsü amokmerenba asoshi EU aser Mexico ajanga jashiba lemsatep.

Mexico-i ibai Trump indang "unfair deal" lir ta aitsü aser par sovereignty ya non-negotiable lir ta nenshia ashi EU chief Ursula von der Leyen-ia nüngdakra kasa tapet mera agitsü ta amokmerenogo. Ajisüaka parnoki US den maneni jembishinü süner ta ashi.

US den shishilempar temi tayang kepzüksü merangra ano taxes tali meshitsü ta Trump-i tekumdangtsü shia lir.

Trump-i Japan, South Korea, Canada aser Brazil nungi aruba oset nunga tariffs tasen taruba ita nungi meshitsü, ta Trump-i shia liasü.

Hokulbarnü European Commission President Ursula von der Leyen dangi shiti ka yokba nung, "European Union den shishilempaba tesendaktep atema küm aika jembia aruogo aser item 'long-term-large, and

persistent, trade deficits' den ner tariff aser non-tariff, policies aser trade barriers nungi onoka ainshitsüla ta tangatetba kati aruogo," ta Trump-i ashi.

"Asenok tesendaktep ya, tia maka, kasa masü," ta shiti nung ashi. EU aser Mexico dangi yokba shiti tem nung, US anema import duties nung tayang kepzükra, pai iba mesük tariffs shilem 30 dak tema meshitsü, ta Trump-i ashi.

Jelia record süa aliba Fox News sensaksem ka Honibar aonung prokshiba nung, linük karbong kanga jashir, saka iba tariffs yagi sen dollar billion noklang aika angutsü, ta Tir Trump-i ashi.

Trump-i mapang shia EU aija arur. April 2 nüa pai iba bloc aser danga trade partners nungi aruba oset nung tariff shiem 20 meshitsü onük benoka liasü. Aser shishilempaba jembishinü terenlok makai anendakba mapang pai EU import taxes shilem 50 tashi tali meshitsü amokmeren.

Washington aser Brussels nati July 9 deadline matongdang tezüngzüktep ka yanglutsü teimla liasü, saka terenlok aliba

sangdong kecha mali. 2024 küm European Union den US trade deficit ya sen \$235.6bn (€202bn; £174bn) liasü ta US trade representative indang office ajanga ashir.

Von der Leyen-i August 1 tashinung agreement agiteptsü asoshi maneni inyaksü atema EU renema lir, ta ashi.

"Nüngdak dang süra countermeasures kasa agitsü densema EU tejangraba kumzüka ayutsü asoshi asenoki nüngdakba mera ajak agitsü," ta von der Leyen-i ashi.

"Alima nung economies ishikati European Union ama shishilempaba yimya shidak amshir," ta lai sangdong nung ashi.

France Tir Emmanuel Macron-ia Trump indang sangdong khenyongi magizükteter ta shia liasü.

Tangatetep kati marutetra, EU-i tapet countermeasures asoshi tekeraba nung renemtsü sentong yanglutsüla, ta France leniri ashi.

European Parliament indang trade committee tekolakba Bernd Lange-ia Trump mera ya jembishinütsü atema tejak nung

amaba lir ta ashi. Tongtipang trading partner ka den tezüngzüktep yanglutsü lenmang kecha mali saka Brussels-i Hombarnü tashinung countermeasures kar benoksüla, ta pai ashi.

EU lenir kari Trump den tezüngzüktep kar yanglutsü ayongzüker. Italy Ato Kilonser Giorgia Meloni-i sangdong ka nung "fair agreement" ka yanglutsü ta tamang akar aser, "Atlantic nung ana tsüngta trade war tenzükba ajanga tajangzüik kecha malitsü," ta ashi.

Dutch Ato Kilonser Dick Schoof-i social media nung US nung ajang kasa ajangzüksüsa tezüngzüktep yanglutsü nükjidong ayuba nung EU lungjema aitsüla, ta ashi.

Mexico lenir dangi züluba shiti nung, North America ya "Narco-Trafficking Playground" ka akumba nungi nokdangtsü asoshi par linüki mapa peria meinyak, ta Trump-i ashi.

"Arütsü wazüka ayuba nung Mexico-i ni yaria arur, SAKA, Mexico-i inyaka aliba ya teperi masü," ta Trump-i ashi.

Mexico Tir Claudia Sheinbaum-i tangatetep kati

arutsü temulung lema aliba lemsatep. "Yashi külem tenzüker temi jembiba nung ajemdaker, USA den tangatetep kati arutsü ta amanger aser jenjang tajungba ngutettsü," ta Sheinbaum-i Honibarnü ashi.

"USA den koma inyaktettsü, aji asenok tsütsü nungi jangja-jangja lir aser asenoki kechi meinyaktettsü, ajia jangja-jangja lir. Aser jembishinü ajanga kodanga tangatetep kati marutetba ka lir, aser ibaji asen linük indang sovereignty lir," ta lai ashi.

Trump indang shiti nungya August 1 nungi tenzüka tariff temloker meshitsü aliba nung 2020 United States-Mexico-Canada Agreement küboki aitba Mexico nunger osettem aden asü madenar mejangja, kechaiser White House-i ibai Canada dak keta lir ta ashir.

Hopta tetenzüklen White House-i Canada dangia shiti ka yokba nung tariff shilem 35 meshitsü amokmerena lir.

Honibarnü tashinung Trump administration-i linük 24 den EU (linük 27) nem tariff meshitsü osang agütsüogo.

Ukraine nung 'condition' kecha makai Russia yaritsü: Kim Jong Un

Moscow, Chiteni/July 13 (Agencies): North Korea lenir Kim Jong Un-i Russia indang ketdangsür ka dang, Ukraine nung raraba mapang Moscow-i mera agir aliba ajak nung condition kecha makai yaritsü Pyongyang renema lir, ta linük ana tsüngta lenirtem senden amenba mapang ashi.

Russian Minister of Foreign Affairs Sergey Lavrov ya anogo asem asoshi North Korea semdangba mapang lir, shiri Russia-i Ukraine nung raratsü atema sepai aser nok-nü agüja lir aser ano mitkar teyari tali agütsütsü nangzüka lir.

Kim-i linük anüolen tzükum nung aliba Wonsan yimti nung Lavrov ajuru, kong Lavrov aser North Korea foreign minister Choe Son Hui na senden tanaben mena taoba küm zülutepba treaty kübok maneni yariteptsü nangzüktepa liasü.

Alima yimtenren kanga melenshiba nung telangzüba agüja mera agiba ajanga alima tesem ajunga nung yimjung alitsü asoshi mera balala agiba indang Kim-i Lavrov dang ashi, ta North Korea indang state news agency KCNA ajanga ashi.

"Ukraine mepetmesü adokdaktsüba tera kakteta aziüoktsü atema Russia leniri mera agia aliba ajunga nung condition kecha makai yaritsü DPRK renema aliba Kim Jong Un-i züngzünga shiogo," ta KCNA-i par linük indang official tenüng Democratic People's Republic of Korea

amshia ashi.

Russia indang Ministry of Foreign Affairs ajanga Telegram nung video ka prokshiba nung lenir ana ya teka amtepa salema aser azütepa ajurutepba nguogo.

Pei linük dignity aser tejangraba tamendak dak wazüka ayutsü asoshi temeshi mapa nung Russian army aser nüburtemi temetetba takok angutsü tamang lir ta North Korea lenir-isa ashi.

Lenir ana ya 2024 küm June ita DPRK-Russia summit nung tezüngzüktep yanglua aliba tem tashi angaa mapa kuma inyaksü tongtipang ta jembitepa liasü, ta KCNA ajanga ashi.

Ukraine nung tesüiba küm ana raraba mapang Russia aser North Korea tsüngta tesenaktep kanga tashi ita akum, koba Russia-i tashi ajak amshia February 2022 nungi maka tenzüik, kong Pyongyang-ia Moscow yaritsü asoshi sepai

10,000 dak tema den nok-nü yoka liasü.

Taoba küm Russia Tir Vladimir Putin-i North Korea semdangba mapang tenokdangba tesashi agüja aliba linük ana tsüngta military deal ka zülutepa liasü, aser yangji mutual defence clause dena lir.

Lavrov-i Kim dang Putin-i tarutsü anogotem nunga maneni indang-indanga jembishinü akatsü imlaba lemsatepogo, ta Russian state news agency TASS ajanga ashi.

Lavrov-i North Korea semdangtsü lia Russia-i Moscow aser Pyongyang tsüngta hopta nung tayimtsü anaben senzütsü sangdonga liasü.

Lavrov-i Wonsan ya tourist puatsü tesem tajung lir ta tenüng asang aser ibai North Korea nüburtem atema kisüng masü saka Russia nunger asoshia nüngtugu tesem ka asütsü imlar ta ashi.

JSM, JTT, JKTM, GB'S & COUNCIL

In Aid of

JANGPETKONG COMMUNITY HALL cum OFFICE

RAFFLE DRAW RESULTS

FIRST PRIZE: 6623

SECOND PRIZE: 11183

THIRD PRIZE: 12576

FOURTH PRIZES: 0423 / 1473

CONSOLATION PRIZES:

7439, 14074, 14423, 4848, 13147, 2846, 9091, 0006, 7644, 9872, 6155, 1037, 7176, 9149, 6297, 5792, 7404, 11394, 7784, 13195, 5363, 3636, 6546, 13104, 11374, 1003, 4120, 4225, 12521, 9325

UNGMA IMPANG KUSASANGER

SANGDONGER

Ungma Impang Kusasanger Pusu Menden Temzüng No. (15) (a) (b) nung aliba ama, shibai yimpang lushi nung yataonta aser masa mangateti senzüsenpongdir merenshitsü ta aliba dak ajemdaker item teküboklen agüja aliba par pezü;

(1) Mr. Lanuchuba Jr S/o Alitemsü (Süngratsü)

(2) Mr. Marsotet Jr S/o Lt. Tajungbenba (Longmisa)

(3) Mr. Purtoshi S/o Lt. Tsüknungwati (Ungma)

(4) Mr. Imtidongtang S/o Lt. Tongpangkokba lkr (Ungma)

Parnoki temzüng anema inyak nung, Ungma Impang Pusu Menden-i temzüng dak aketba ama tanü 12th July, 2025 anogo merenshiba nübur ajak dang sangdonger.

Sd/-

- (1) Imtidongba Jr Tatar
- (2) Lipokzulu Lkr Tatar
- (3) Imkum Pongen Tatar

ALI AYOKER

AT NIHOTO VILLAGE, NEAR 4 LANE
PLOT AVAILABLE ANY SIZE
Rate: Rs. 170/Sq. ft.

- Contact -
9612242850
7005386130

PUBLIC NOTICE

Sonal Bechka

Notice diya ase je talokol goli dhanor account/s jor kisuman Federal Bank Ltd ke bechibo 30.07.2025 ba anyek bisar / dinat, tenekoi dalok branch kotha aase, karon jaor borkar jor kotha pledgar item/s turu chukhibo nai / loan account/s regularise nai korile. Dhanor branch kothat contact koribo nimite bisari janibo ki sukh.

Branch	Name of Customer	Gold Loan Account Number	Branch Address & Contact Details
Dimapur	Rintu Dhar	11886100044923	The Federal Bank Ltd, Nyamolotha Road, Old Church Road, Dimapur, Nagaland, Dimapur, Nagaland, 797 112 Phone: 03862225725
	Rintu Dhar	11886100045482	
	Raju Roy	11886100046779	
	Raju Roy	11886400003991	
	Raju Roy	11886100046613	

Thaan: Dimapur
Tithit: 14/07/2025

Sd/-

For The Federal Bank Ltd, Nyamolotha Road, Old Church Road, Dimapur, Nagaland, Dimapur, Nagaland, 797 112 Phone - 0386 2225725, Email: dmr@federalbank.co.in, Website: www.federalbank.co.in

Indian Super League 2025-26 season sota atar

Chiteni/July 13, 2025 (Agencies): Master Rights Agreement (MRA) yanglushitsüba dak sendakba nung ken o mejangjai aliba ajanga Indian Super League (ISL) 2025-26 season sota atar ya ashiba sülen anogo ka lir All India Football Federation (AIFF)-i Honibarnü, linük nung football asaya atema ISL ya koda tongtibang iba indang lemsatsep, ajisiüka inyakyim ajak linük temzüng ozüng dak ajemdaker aotsüla ta ashi.

AIFF aser Football Sports Development Limited (FSDL) na tsünga MRA ya taküm December 8 nü tembangtsü aser iba mapang tashi nungbo league ya ita asembo asayar alitsü. FSDL yagi ISL achaayanger.

FSDL-i Hokolbarnü ashiba agi, December aden tenangzüktepeba meyanglu tashi 2025-26 ISL season atema sentong meyanglutetsü mesüra commercialize

mesütettsü, anungji season ya sota atatsü telemtetba agiogo. Iba dak sendakba nung AIFF-i sangdong ka ajanga, parnoki takokba tashi temzüng ozüng dak ajemdaker league maneni asayayonga aotsü atema inyaksü.

Supreme Court-i tetuyuba agütsüba dak ajemdaker AIFF-i, AIFF draft constitution dak sendakba nung Court-i o bendanga ka magütsü tashi FSDL den MRA term tasen tembanga meyanglutsü tetuyuba agütsüogo.

AIFF-isa, FSDL den mapang shitak nung sensaksem tenzüko aser ken o balala lemsatsepogo, saka court-i tetuyuba agütsüba sülen sensaksem anena lir, ta ashi.

Tang tetsükdaktsü tila ka adoker liaka AIFF-i, ken o dak sendaka alir ajak dang parnok tejangraba kumzüka toktsütsü aser Indian football iba ajanga

mekongshidaktsütsü, ta tenangzükba agütsüogo.

FSDL, AIFF indang commercial partner nati 2010 küm 15 atema MRA nung sign asü. Iba tenangzüktepeba kübok FSDL-i küm shia AIFF nem crore 50 agütsütsü aser iba melenanational team densema broadcasting, managing, aser Indian football commercialize asüba ajak parnoki agitsü mulungtepa liasü.

Iba sen ya AIFF inyakyim aser terenlok maparen balala atema kanga tongtibang liasü.

FSDL-i taoba mapang ISL club kiburtem dang MRA inyakyim mebantet tashi taruba season metenzüktsü, ta shir liasü.

Taoba mapang PTI sangdong ka ajanga ashiba agi, FSDL-i ISL achaayangtsü atema holding company tasen ka tentettsü asadangdar, kong club tem (60 per cent), FSDL (26 per cent), aser AIFF (14 per cent) nunger kibur asütsü.

East Bengal-i Edmund aser Bipin Singh na alizükogo



Chiteni/July 13, 2025 (Agencies): East Bengal FC-i Indian national team attackers Edmund Lalrindika aser Bipin Singh na alizükogo aser iba ajanga season tasenba metenzük tsünga parnok forward tashi taitba kümdaktsüogo.

Edmund ya Inter Kashi FC nungi ao aser club den küm asem atema tenangzüktepeba yangluogo. Arishi küm 26 tain forward asayar ya küm pongu sülen East Bengal-i meyipaogo aser pa jersey number 10 asemtsü.

Pa taoba mapang 2019-20 I-League season nung Bengaluru FC nungi loan nung oa East Bengal nungi asaya, saka Mohun Bagan den mezüngbuba asaya nung yiruba sülen masayateti aküm.

Iba sülen pa I-League nung kanga junga asaya aruogo. 2024-25 season nung pa Inter Kashi nungi asaya 24 nung asaya aser iba mapang pai goal pezü idaktsüba den assist trok süja liasü. Iba club nung pa season ana asayaba mapang pai goal ti idaktsü aser assist 13 süja liasü.

Edmund ya AIFF Elite Academy aser Bengaluru FC

indang youth system nungi anitetba asayar ka lir aser pa 2024 küm June ita Kuwait den FIFA World Cup Qualifier asayaba mapang India team nungi mezüng asaya liasü.

Kasa mapang nung Bipin Singh-ia club den küm ana atema tenangzüktepeba yangluogo aser ano küm ka atsülangtsü atema lenmang sadema lapoka yuogo. Arishi küm 29 tain winger ya Mumbai City FC nungi free transfer nung arua denogo, kong pa küm tenet tashi asayaogo. Pa ya Mumbai nungi asayatem rongnung goal timtiba idaktsürtem rongnung tanabuba lir. Pai asaya 158 nung goal 28 idaktsü assist 17 süja liasü. Pai, Mumbai nungi asayaba mapang ISL Shields ana aser ISL Cups ana kokogo aser 2021 aser 2024 küm ISL final nung goal idakja liasü. Pa jersey number 29 asemtsü.

Asayar anaprongla alizükba ya East Bengal indang Head of Football Thangboi Singto aser Head Coach Oscar Bruzon naprongla jangjatsüogo. Club-i, Edmund aser Bipin nati East Bengal team nung tongtibang shilem agitsü ta amanger.

Pakistan hockey team tem India nung masayatsü

Chiteni/July 13, 2025 (Agencies): Taruba küm FIH Men's World Cup nung asayatsü atema Pakistan team tejangraba aliba nung tetsükdaktsü adoka, team ya taruba Asia Cup aser taküm küm tatemlen Junior Men's World Cup atema India-i marutsü akok, ta AFP sangdong ka ajanga metetdaktsü. Linük ana tsünga tesendaktep mejungi aliba mapang ka nung tang Pakistan team-i India mesemdangtsü akok

Küm terser ta kir India aser Pakistan na May ita anogo pezü tashi kanga mejungi raraogo aser iba mapang nisung 70 tepseta liasü.

Pakistan team Asia Cup nung asayatsü liasü, koba India nung taruba ita asayatsü aser iba atema hockey federation-i sorkar dang temelaba meshiogo.

"Tawa rara adokba sülen onok hockey asayatem kumzüka mali ta bilemer," ta Pakistan sports ministry source kati AFP dang ashi.

Pakistan team November ita India nung asayatsü aliba Junior World Cup nunga masayatsü, ta source yagi AFP dang ashi.

Pakistan team ya mapang ka nungbo international

hockey nung ajaki tsübuba team ka liasü aser parnoki Olympic gold medal asem aser world title pezü bena lir, saka parnok tang jenjang 15buba nung lir.

Asia Cup nung shilem magiba ajanga Pakistan team 2026 senior World Cup nung asayatsü atema tetsükdaktsü adoktsü akok, kechiyong iba asayamung ya qualifier ka lir. 2026 senior World Cup ya Netherlands aser Belgium na nung asayatsü. Maneni ano sorkar source katia iba telemtetba agiba ya AFP nem metetdaktsüogo.

2008 küm Mumbai amakba sülen India-i Pakistan den bilateral saisabong nung kecha tesendaktep mayutsü telemtetba agia liasü.

Iba telemtetba agiba ajanga cricket asaya dak tamajungba kongshiogo aser linük ana ya international asayamungtem nung dang asayar.

2025 küm Pakistan nung Champions Trophy asayaba mapang India-i Pakistan-i oa asayatsü memulung aser iba ajanga India team asayatem ajak Dubai nung asayatsüsa aküm.

Iba dak sendakba nung telangzüba agüja Pakistan-ia, taküm tetsü 50-over World Cup aser 2026 küm T20

World Cup atema India-i Pakistan tetsür team meyoktsü.

Tesendaktep mejungi aliba mapang kiralongrartemi April ita Pahalgam nung alima penzü 26 tepset aser iba sülen India-i May ita Pakistan kübok tesem balala amakba sülen linük ana tsünga tsendaktep kanga mejungi kumogo.

Pakistan hockeyteamatema India nung 2023 Asian Championships Trophy nung asayaogo, kong parnok pongububa nung tembanga liasü.

Devon Hay, Jimmy, Tim nunger NZ team nung denogo

Chiteni/July 13, 2025 (Agencies): Devon Conway, Mitch Hay, Jimmy Neesham aser Tim Robinson nunger, Harare nung Zimbabwe aser South Africa na den Tri-Series asayamung atema New Zealand T20 team nung adentsü.

Wicketkeeper-batter Conway-i iba asayamung tepeyong atema Finn Allen melentsü, shiba iba hopta tetenzüklen tetsüng yiruba ajanga masayatetsüsa kumogo.

Kasa mapang nung Hay, Neesham aser Robinson nunger Michael Bracewell, Mark Chapman, Glenn Phillips aser Rachin Ravindra nunger melenashimogo,

shirnok Hombarnü Major League Cricket tournament final asayatsü lir.

"Finn atema onok kanga mepelar," ta New Zealand indang head coach Rob Walter-i ashi.

"Ni pa den inyaksü aser pai MLC nung kanga junga asayaba ama maneni iba asyamung nunga asayaba repringtsü yongyaseta ata liasü, saka tia maka pa yiruogo.

"Finn melenan Devon amala asayar ka jaoktsüsa

aliba ya onok atema kanga tia taka."

"Asayatem ishikabo Hombarnü MLC final asaya nung shilem agitsü ta onoki meteta liasü, anungji onoki parnok melenan Mitch, Jimmy aser Tim nunger anir aruogo," ta Walter-i shisem.

New Zealand team iba asayamung nung mezüngbuba asaya South Africa den July 16 nü Harare nung asayatsü aser iba sülen anogo ana lir host, Zimbabwe den kasa tesem nung asayatsü.

BILEMDANGANG

"Anogo tasen shia-i mapa tajung inyaksü maongka bener arutsür."